

# 1 Tésáróníka

Ísu wíyómpa'a iyówana Póro moórá-waai-aataiya'iyó miyáumai-aatai maisuwéna maanááimá agaimái Tésáróníkaa-naoraa-waasifa'a agaimái mátímakaiye. Póro ásé-aii kosimátimuwasa isésa érai'e sésa Ísumpa'a timankúnkúmba uráawe. Mináái Aantá-waasi-taai-aufaiifimba 17:1-9-fimba wéraiye.

Ísun-aii Póro fl'o-fi'on-daopa'a kosimátiména Kórinti-naopa'a koméronka'a Tímóti Tésáróníkaa-naopakén-kwaasi-taai kosimátiména wéaisai-un-aaima kosimámuwana anondáá-aii agaimái tímúwasa mátímakaawe.

**1** <sup>1</sup> Kemá Póro maanáái maanáúfáifimbá agai-timúmpo ísáaro. Moóráwígon-awí'a Sáírásíye moóráwígon-awí'a Tímótiye kesé'o méraayanka'a moórá-aii sénaumpo ísáaro. Tésáróníkaa-naopakewi Maníkóní waási ísáaro. Maníkó kentáásifowae'o káásamaimo mé'o Fasi'aénkó Ísu Káráísitiye'o káásamaimo méraawi ísáaro. Maníkó úwoi wétuwa'nai-ena faru wéuwatinkaintafe'a inái súné.

**Tésáróníkaafaken-kwaasi Maníkómpá'á timankúnkúmba uráan-aii.**

<sup>2</sup> Inaimó súndarataamo únda kembiwísáféta imáyáama éta Maníkómpá'á aasiyaasí súwiyosa wésune. <sup>3</sup> Ísun-aaisafe'a timankúnkúmba é'a pó'a wení kísaua kawe'-úmai wémaewe. Maníkómbá tirumbó wéametafe'a pó'a kawe-kísáúmá fasi'ámai wémaewe. Kentáásí Fasi'aénkó Ísu Káráísiti érai'a kumíníye sentáfé'a pó'a fasi'ámai mé'a wéamu'maraawe. Miyaráán-úmai méraantafeta imáyáama éta Maníkó kentáásifowampa'a súwiyosa súné. <sup>4</sup> Maníkó arumbá tíména wení waási-i'o uwátínkaraimba éta tuwánaraumne. <sup>5</sup> Ímba kentáásí imáyáafinkemba úwoi-aaisa kosimátimewandanifo Maníkóní Ufaen-ámútánkó keséta mérowata Maníkóní fasi'aénkwará'á ásé-aii kosimátiméta ásé-aaisafeta simankúnkúmba fasi'ámai uráundasa minásé-áái kosimátimewanata ísaraawe. Ísowata séta Maníkóní waásin-owesa siyáumne. Kesétaamo maéwándarata wétuwa'nai-eta méraawana'a suwánaraawe. <sup>6</sup> Fasi'aénkómó úntenkwara kesáámó ówándantenkwara'a miyá uráawe. Miyámó umbá umbái tiyómbanifo ímba ifátuwanee sumbá simátimakon-aaima méta'otokaawe. Maníkóní Ufaen-ámútánkó imáyáama tímúwa'a tirumbá kawe'-úmai mé'a ásé-aii méta'otokaawe.

7Miyáumai mérowasa pósa Maníkón-aaisafesamo timankúnkúmbo on-kwáásímá Máséndóniyaafakene Ákáyaafakene miyáumai-naoken-kwaasi kembá tuwánésa kemó untembá miwí uráawe. 8Fasi'aénkón-aaí kentópakemba simátíma'maesa kuráawe. Ímba Máséndóniyaa-waasiwara Ákáyaa-waasiwara aantembanifo seyaafá'-áémpákén-kwáásíwará'á ísaraawe. Maníkón-aaisafe'o timankúnkúmbo on-áái seyaafá'-áémpákén-kwáásí ísaraawe. Maníkámpá'ó kááísamai méraan-aaí é'a ísáamba póta ímba anekató simátimenaumne. 9Kempátáámó komaéwándara'a kawetáámó uwásínkarontafesawe sésa kawé'-áái wésewe. Waántá-waasiti aambá tuwésa Maníkámpá'á tiyóntafesawe sésa kawé'-áái wésewe. Maníko fasi'aénkwáráwí érai-Fasi'aenko wení kísau wémaentafesawe sésa kawé'-áái wésewe. 10Aneka'á wiyómpakemba Maníkón-ááninko Ísu kumíniye sé'a wéamu'maraantafesawe sésa kawé'-áái wésewe. Maníko Ísumba pukómpinkemba íyáfasinankowana sáwí-imayaagomo ta'ótokaimpinkemba faúsinkenasa kawepátá mósinkena séna Maníko aaiimbó maitinkáíndara'a faútinkaundawi ímba maitinkáíníyemo siyáiwaimba amu'maráantafesawe sésa kawé'-áái wésewe.

### Tésárónikaafa'a Póro kisaumo maiyáin-aaí.

**2** 1Kentáásí waásisono. Kesé'o komaéwándarata áúwara-kisaumo maéwándasa éta suwánaraawe. 2Ímbo kentópa'o kówánda-kanaafinta Fírípái-naopa'a komaéwánasasa suwánésa sínkamesasa sáwítaamo uwásínkón-aaí é'a ísaraawe. Maníko wení fasi'aémbá símakowanasa póna ímba sáá'a úwata ímba tiyawembá ówándasa Tésárónikaafata kentáá Maníkóní ásé-aaisa kosimátímakaumne. Sáwí'o uwásínkówisa umbaisá siyómbanifo ímba tuwááwándasa 3ímba karo'-ímáyááfínkémbá simátimeta ímba aare-úmén-ímáyááfínkémbá simátimeta ímba waé'wáé-ááífínkémbá simátimewandasaanifo 4Maníko kentáásáféna séna kesí waási ontáfé'a ásé-aaí kosimátíma'mae'a koró súwata simásímakain-aaí kosimátíma'maeta kuráumne. Maníko wen-ísarena kesiruntá tuwináinda póta kísau wémaeta séta waásimo suwánésasaamo ésa tuwímbai aamoí íyasa tuwímbai ímba aamoí íyamba póna Maníko suwánénasa aamoí íníye-imayaa éta kísau wémaeta 5kentópa'a ásé-aaí kosimátimeta ímba tirunkáámbá kofaiyá'mai-aaiinkemba kosimátimewandasa ísaraawe. Ímba símai fí'lowani moparáwíntáféta súraníyamba wéeta kosimátimewandasa Maníko suwánaraiye. 6Ímba símaimo kembiwíwará fí'on-kwaasiwara'a kesúwíta óraa'a ónae-imayaan-oyo séta kosimátímakaumne. Kesé'o maéwándarata Ísu Kárásiti si'marón-kwaasisa ówándanifo ímba óraa'-waasi-ita úmai méta 7wempatá úmai méta aaregómó wení iyámpóimo káráwiyíntenta uráumne. 8Kembiwí kesiruntá tímaketa Maníkóní ásé-aaí kosimátimeta sínkamiyata puwúnafo-imayaa ínta ówándasa Maníkóní ásé-aaisa kosimátímakaumne.

<sup>9</sup>Kentáásí waásisono. Kesé'o maéwáandarataamo fasi'aén-kísáúmó maéwánda táaka'a makáawe. Maníkóní ásé-aaimo simátimewandasa aafáyára'e fenómpinka'e nó'waane kísausa maiyáumne. Tómbá ímba úwoi simíwae séwánda tómbá méyánúmai wéneta maiyáumne. <sup>10</sup>Kembiwí Maníkómpá'á timankúnkúmba uráawise'a maéwáandarata kawé'-úmai arupíse úmai méta ímba sáwí'a ówánda maéwána'a suwánontemba Maníkówárátá suwánaraiye. <sup>11-12</sup>Tifoísáimo kentí iyámpóimo káráwiyonten-úmai moórá-mora kesáámá káráwiyeta méta faru uwátinketa Maníkón-aai kawé'-ááímá wésimatimeta séta miyaráámá íyantafe'a Maníkómbá aráái wáiyana Maníkó aamoí íníyesa siyáumne. Maníkó wésimba pó'a wemó kawáánipa'o wení sámó kaipa'á táméranaawe. Miyámó íyantafe'a Maníkómbá aráái wáiyana wemá aamoí íníye.

<sup>13</sup>Maarán-ááíwárátá Maníkómpá'á aasiyaasí súwisa sune. Maníkón-aai simátimewandarata kembiwí sé'a waási-taain-íye ímba sumbá Maníkón-aain-íye sé'a tirumpimbá fasi'ámai méta'otokaawe. Simátímakaunda-aai érai'a Maníkón-aain-íye. Simátímakaunda-aaisafeta timankúnkúmba ombá póna minááígó wétuwa'nai-íye. Mindásafeta iséta Maníkómpá'á aasiyaasí súwiyosa sune.

<sup>14</sup>Kentáásí waásisono. Yúndaa-aempaken-kwaasi Fasi'aénkóní waási Ísu Káráísitiye'o kááísamaimo méraan-kwaasifa'o paápé uráintemba kembiwíwárátá miyá uráíye. Yúndaa-aempaken-kwaasimo miwífínkémbá Ísu Káráísitin-aaisafesa timankúnkúmba wéompinkemba sáwí'o uwátinkaraantemba kentí waási kembá sáwí'a uwátinkaraawe. <sup>15</sup>MinYúndáá-wáásí tíwá'náma naaófá'á Maníkón-aai simátímakowí tínkanto'naamai úmae wéiyuwasa putásowasa maimaé wéiyesa matínkámae iyówasa miwí tísaafitantamba ésa káfé'o méraawi Fasi'aénkómbá Ísumba tufúwana puwúwasa kentáámá sáwí'a uwásinkesa arááiwakaawe. Miyámó untáféna Maníkó ímba aamoí uwátinkaraiye. Miwí seyaafá'-wáásítí namuro-wáásíyáámbán-owe. <sup>16</sup>Maníkó sáwí-ampakemba kawé'-ámpá'ó métinkaindasafeta fí'onkaa-waasisafeta Maníkón-aai simátíma'maeta wégundasa Yúndaa-waasi aambá fáisinkesasa seyaafá'-wáásítí namuro-wáásíyáámbá wéowe. Tíwá'náti sáwí-kisauwara'a káfé'o méraan-kwaasi maimaé wéiyowana káfé'a Maníkó aaisambá wétiyiye.

### **Póro aneka'á kotuwánánaemo siyáin-aai.**

<sup>17</sup>Kentáásí waásisono. Kembá tiyuwéta maankálá ampáánká'á taméta kembiwísáféta imáyáa áfááraumai wéeta kembó kotuwánaanda-antafeta wésaafa-eta <sup>18</sup>aneka'á kotuwánánae séta kemá Póro sé'a aneka'á kotuwánánae símasima'a wéunana waántáwanko aambá fáisinkaraiye.

19 Ánaaemba Fasi'aénkó Ísumo kumínda aúranka'a kométa nóintafetaawa amu'maránaum nóintafetaawa aamoisá ónaumno. Kembiwísáféta imáyáa éta aamoisá ona'á 20 kentáá súwí'a mósá maráiyana sirunkósá aamoí íniye.

**3** 1 Kentáfékai óraa'-imayaa wéekainifo maankákái maékai kembiwí fí'opa'o méraantafekai Áténisi-naopa'a kerái maékai 2 Tímótimba ai'marááwáyana kentópa'a kuráiyé. Tímóti kentáási kawé'-wáási póna wesé keséta Maníkóni kísausa wémaunanasa póna Ísu Káráisitini áse-ai simátíma'maena wéwiye. Koáfomba faiyáina'a Maníkémpá'á timankúnkúmba fasi'ámai íwae sé'a Tímótimba ai'marááwánana kuráiyé. 3 Maníkón-ai ímbo isááwi sáwí'a uwátinkaiya'a Maníkémbá aúwáafo sé'a Tímótimba ai'marááwánana kuráiyé. Maníkó séna kesááimo ímbo isááwi sáwí'a uwátinkanaawe siyáimba pósa kentáá sáwí'o wéuwasinkaamba é'a ísaraawe. 4 Kesé'o maéwándarata séta sáwí'a uwásinkanaawemo siyáundasa káfé'a mápaape-isa'a wéawanaawe. 5 Kemá imáyáa é'a waántáwanko séna Maníkémbá auwésa kesáái isáíwae sintáfé'a miyá uráawe. Maníkémpá'á timankúnkúmba wéoo sé'a kentáái isánae sé'a Tímótimba ai'marááwánana kentópa'a kuráiyé. Kentópa'a kísauomo komaéwánda áúwara-kisauma maiyáunda káfé'a minkísáúgón-áuma áwiyo'wifo sé'a Tímótimba ai'marááwánana kuráiyé.

6 Tímóti kentópa'a koména kouweréna kesópata téna kembiwísáféna séna Maníkémpá'á tirumbá timésa wenká'á timankúnkúmba fasi'ámai owé séna áse-aaisa tasimásímakaiye. Kembiwí kentáfé'o sé'o kawé'-áái siyémo senkwárá'á tasimásímakaiye. Kesáámó sétaamo kembiwí kotuwánánaemo súna'o kentáásáfé'o tatuwánanaemo senkwárátá tasimásímakaiye. 7 Maníkón-ai simátimundarakemba tuwímbai sáwíta uwásínkáánka'a Maníkón-aaisafesa timankúnkúmba fasi'ámai on-áái tasimásímakaimba póna áfombo faiyáin-ai tasimásímakaiye. 8 Fasi'aénkémpá'ó kááísamaimo fasi'ámaimo méraan-ai iséta póta kawetá úmai méraumne. 9 Maníkémpá'á fasi'ámai méraawata póta Maníkónópata kentáásirunko kawé'a wéisata Maníkémpátá súwi sune. 10 Kentópataamo konda-ámbá Maníkó wí'maráíndasafeta fénáímpinka'e aafáyáara'e Maníkémpátá fasi'ámai áisai úmae wéiyune. Maníkón-aaisafe'a timankúnkúmba ombánifo moóráfa'a wétuwaantafeta kotúwa'nai ónae séta Maníkémpá'á fasi'ámaisa sune.

11 Inái súndasa pósarai Maníkó kentáásifowae Ísu kentáási Fasi'aénkéóe úmai kentópataamo konda-ámbá wisinkáyááye. 12 Inái súndasa póna kesiruntá áfááraumai tímakaundanten-úmai Fasi'aénkómá imáyáa timína'a moórá-mora kentirumbá timé'a seyaafá'-wáási kentirumbá timé'a ménaawe. 13 Miyá íyana Maníkó kentirunkómbá fasi'átinkaina'a

Ísu kentáásí Fasi'aénkómó wení waásise'o kumíndara'a Maníkó kentáásifowan-aúranka'a kawé'-úmai méraiñana sáwí-aai kempímbá ímba wéraindasafeta inaí súne.

**Miyásáámó wéunanasaamo Maníkómó aamoisáámó wéuwasinkain-aai.**

**4** <sup>1</sup>Kentáásí waásisono. Moórá-aaiwara'a ísáaro. Fasi'aénkó Ísuwe'o kááísamaimo méraundasafeta wa'wiséta óraaka'a simátimeta séta Maníkómbó arááímo taiwáíní áwáumo aráátimundasa arááíwa'mae'a wéwiyana Maníkó tuwánéna aamoí uwátinkainiye. Minááígóní áwáuma é'a wéaraaiwaefo miyáumai arááíwa'mae'a koró. <sup>2</sup>Fasi'aénkó Ísu simásímakain-amaanta simátimewanda é'a isé'a wéaraaiwaewe. <sup>3</sup>Maníkó maarámó íyantafena aráái wétaiye. Kembiwí Maníkómpá'á té'a wendé-í'a taúráaro. Aare-úméné inaamaru-úméné aséráaro. <sup>4</sup>Waaimó é'a aaremó maíyamba arupíse úmai máéro. Miyámó íyamba Maníkó miyámó íyantafena aráái wétaiye. <sup>5</sup>Maníkómpá'ó ímbo tiyáan-kwaasimo ontembá ímba miyán-oro. Póí-iyankomo waafán-ínímbó máéntemba ímba miyán-oro. <sup>6</sup>Maníkóní ámáámba miyáumai wéraintafe'a aaremó maíyamba kentí waási ímba sáwí'a uwátínkáaro. Ááema óraaka'a simátimeta séta miyá-sáwí-ámpá'ó wíyanamo éna Maníkó umbai-méyámbá timíníye. <sup>7</sup>Maníkómó wení waási-i'o uwásínkáinta kawé'ó úmaimo méraandasafenasa wéuwasinkaiye. Ímbo sáwí'o úmaimo méraan-ita wéuwasinkaiye. <sup>8</sup>Mindásafesa súnda-aai isésa tínaeni'o uwátimiyawima ímba waási aantemba tínaeni'a uwátimenafo Maníkó wení Ufaen-ámútámbó tímiwainkwara'a tínaeni'a uwámenaawe.

<sup>9</sup>Kembiwí kentí waási Maníkón-aaisafe'a timankúnkúmbó on-kwáásí moórá-mora kentirumbó tímén-aai Maníkó aráátímakaimba pó'a é'a miyá wéofó moórá-mora kentirumbó tímén-aai maankwándááífímbá ímba agaénaumne. <sup>10</sup>Kembiwí Máséndóniyaa-aempaken-kwaasi Maníkóní waási é'a kentirumbá tímakaawe. Óraaka'a séta moórá-mora kentirumbá tíma'mae'a íyóro sumpo <sup>11</sup>fasi'ámai imáyáa wé'e'a faru úmai mé'a kentúra'a káráwiye'a tómbó maíyantafe'a kísau máéro. Minááímá éta simátímakaunda <sup>12</sup>miyá é'a kísau maíya'a Maníkómpá'ó ímbo tiyáan-kwaasi tuwánéna kembiwísáfésa kawé'-wáási owémá sénááwe.

Miyá é'a kísau maíyana ímba táái táíníye.

**Fasi'aénkómó kumínda-aai.**

<sup>13</sup>Kentáásí waásisono. Maníkón-aaisafesamo timankúnkúmbó un-kwáásímó púwówasamo utámakaan-kwaasisafe'a tirunkó sáwí'an-ifo séta érai'-aaimo simátíménda ísáaro. Maníkómpá'ó ímbo kááísamaimo mésamo Ísu kumíndara'o pukáampinkembo íyáfasinaiyantafesamo ímbo amu'maráan-kwaasi tirunkó sáwí'a wéifo kembiwí miyán-oyo séta senda-

ááísá ísáaro. <sup>14</sup>Ísu pukáimpinkemba íyáfasinkaintafeta érai'esa súmpo Ísun-aaisafesamo timankúnkúmbo ésamo pukáan-kwaasi Maníkó miwíwára Ísunkwara'o tiyáinda-aaisafeta érai'esa súne. <sup>15</sup>Simátíménda-aaima Fasi'aénkómá siyáin-aain-iye. Fasi'aénkómó kumíndara'a úwoimo túmó aráan-kwaasi pukéwi aifa'á ímba íyáákanaawe. <sup>16</sup>Maníkóní kísau-waasigo wíyómpakewi aái sínana Maníkóní uwíyenko óraaka'a aái sínana Fasi'aénkó óraaka'a wésindafinkemba wíyómpakembo kumínda Ísu Káráísitin-aaisafesamo timankúnkúmbo ésamo pukáan-kwaasi aifa'á íyáfasinaiyata <sup>17</sup>Ísu Káráísitin-aaisafeta simankúnkúmbo étaamo úwoimo súmó aráandawisa kufarámbainata ainámpímbá aifa'ó iyáawise'a itúwaandu éta Fasi'aénkómbá iawánéta miyáumai aasiyaasí Fasi'aénkóe'a maé'mae'a ónaumne. <sup>18</sup>Míndásafe'a simáti-simati wée'a fasi'átinke'a méraaro.

**Fasi'aénkó kumíndasafetaamo to'mayaa onda-áái.**

**5** <sup>1</sup>Kentáásí waásisono. Fasi'aénkó Ísumo kumínda-kanaa ímba ísare'a maankwándááífímbá ímba agaiyáumne. <sup>2</sup>Kemá ísaraawe. Nó'waamba umén-kwáásímó kafífímbó tentenkáán-úmai Fasi'aénkó Ísumo éna miyáumai kumíníye. <sup>3</sup>Waásimo maarámó sentembá káfé'a kawé-kánááífímbá aáno úmai méraumne síyambanifo minúwóiyáámbó éna sáwí-kanaago téna tasáwí'a uwátinkainiye. Aaregóní kanaamó tisanamó ímbá iyámpói wéma'ankaiye. Miyámó ontembá misáwí-kánáágómó éna ímbo asétinkainda seyaafá'nánká ta'ótorainiye. <sup>4</sup>Kentáásí waásisono. Umén-kwáásígómó kentí moparáwímbó tamaimaiyáina'o awáné'o é'a táátafe'a iyambanifo ímba kumeup'á méraamba póna Fasi'aénkó Ísumo kumínda ímba táátafe'a ónááwe. <sup>5</sup>Kembiwí sámó kaiwáín-aráátomba owatá kesááwár'á ímba kumeukóndésá úmpo sámó kaiwáíndésá úne. Ímba sáátafeta ónaumne. <sup>6</sup>Tuwímbaimo ombá Ísumo kumínda-imayaa ímbo ombá káátumo wáéntenkaamba wéofó kesáá ínta miyásá éta káráwimaisa kawé'-ímáyáásá úmaisá ménaumne. <sup>7</sup>Waási nó'waamba tún-kwáéwasa uwóí'o on-dómbó naan-kwáásí nó'waamba nésa uwóí'a ónááfo <sup>8</sup>kesáá sámó kaiwáín-aráátomba póta ímba miyaráántá ondasá kawé'-ímáyáá úmaisá ménaumne. Miyáumai méta wenókáámbó faférimaisaamo méraundantemba Maníkómp'á simankúnkúmbo éta waásisomba siruntá wétimeta méraumne. Wenótámbó súsaamo fáituwaundantemba Ísu Káráísiti kusiyáíndasafeta amu'maréta méranaumne. <sup>9</sup>Maníkó wení waási-ita uwásínkaraimba kentáásí sáwí-kisaurakemba Maníkó ímba áyánta uwásínkainifo Fasi'aénkó Ísu Káráísiti kentáásí

sáwí-kisaugomo ta'ótokaimpinkemba faúsinkenasa kawep'á mósinkaindasafena Maníkó wení waási-ita uwásínkaraiye. <sup>10</sup>Fasi'aénkó Ísu Káráísiti kentáásáfénawe séna pukáimba póta kumínataamo éta úwoisaamo méraunda-waasiwara pukáan-kwaasiwara'o éta weséta

ménaumne. <sup>11</sup> Mindásafe'a moórá-mora túwa'nai e'a kawé'-áái símasima'o íyamba pó'a fasi'ámai ménaawe. É'a wéomba pó'a miyá úmae iyónááwe.

<sup>12</sup> Kentáási waásisono. Moórá-aaimo óraaka'o simátíménda ísáaro. Kempímbá kísau maésa kawé'-áái simátimesa fasi'ámai arupíse uwátinkaiyantafena Fasi'aénkó miwí íyáfasintinkarain-kwaasi-taai taawiyáfóro. <sup>13</sup> Kembiwífímbá miwí kísau wémaentafe'a pó'a miwí táai mósá maré'a kentirumbá wétime'a méraaro. Kembiwisé'a faru úmai méraaro.

<sup>14</sup> Kentáási waásisono. Óraaka'o súndasa kafóná-waasisafe'a óraaka sé'a arupíse uwátínkáaro. Táátafesamo íyan-kwaasi tirumbá fasi'átínkáaro. Aamoisaén-kwáásíwará'á túwa'nai oro. Seyaafá'-wáási wempa'á aáno úmai méraaro. <sup>15</sup> Kembó sáwí'o uwátínkéwa'a anondáá miwí sáwí'a uwátínkáafo sé'a aambá fáitínkaaro. Aasiyaasí miyáumai kembiwisé úmai fí'on-kwaasiwara'a kawé'á uwátínkáaro.

<sup>16</sup> Aasiyaasí tirunkó aamoí ína'a mé'a <sup>17</sup> Maníkómpá'á inái símae wéiye'a ímba saagaaró. <sup>18</sup> Kentópa'a fí'o-fí'on-tantaa'a kawé-tántáá'é umbai-tántáá'wará'ó tinda Maníkómpá'á súwi seró. Miyámó íyamba Maníkó miyámó íyantafena wéankaiye. Ísu Káráisitiye'a kááísamai mé'a Maníkómpá'á seyaafá-tántáátáfé'a súwimo wésemba Maníkó miyámó íyantafena wéankaiye.

<sup>19</sup> Maníkóní ámútankomba ímba aambá fáí'anke'a <sup>20</sup> Maníkóní ámútankomo simátímakain-aai wésimatimiya'a mináái ímba tínaaemba uwáméro. <sup>21</sup> Seyaafá-tántáá'á tuwíntuwe'a kawé-tántááká'á fasi'ámai méta'otoraaro. <sup>22</sup> Seyaafá'á fí'o-fí'o-sawi-tantaatafe'a aséráaro.

<sup>23</sup> Maníkó faru wéuwatinkaiwaini áwáun-iyé. Wemá kembiwí wefári'o índasafeta inái sune. Maníkó kentí imáyáara'e túwawaaka'e timanka'é káráwiyina'a kawé'-úmai méraiýamba Fasi'aénkó Ísu Káráisiti kumíndara'a ímba sáwí-aai kempímbá wéraindasafeta inaisá sune. <sup>24</sup> Maníkó éraikoni áwáuma póna wení waási-i'a uwátinkaindasafena táántaraiwai wemó siyáintemba miyá uwátinkainiye.

<sup>25</sup> Kentáási waásisono. Maníkómpá'á kentáásáfé'a súwa'nai e'a inái seró. <sup>26</sup> Maníkóní akúmbá tiyáamba tíméro sune. <sup>27</sup> Fasi'aénkó simásímakaintafe'a óraaka'a simátime'a sune. Maankwándááífínkén-áái toráumai Maníkóní akúmbá seyaafá'nánká simátíméro.

<sup>28</sup> Fasi'aénkó Ísu Káráisiti aasiyaasí úwoi wétuwa'nai-intafe'a inái sune. *Kemá Póro súnda-ai tai'áiyé.*